

प्रादेशिक समाचार एकांश  
आकाशवाणी रायपुर (छत्तीसगढ़)  
प्रादेशिक समाचार बुलेटिन  
18.10 सोमवार दिनांक 11.11.2024

प्रमुख समाचार –

- केन्द्रीय गृह अउ सहकारिता मंत्री के अगुवई म उच्च स्तरीय समिति ह “राज्यों में अग्निशमन सेवाओं के विस्तार और आधुनिकीकरण” योजना म छत्तीसगढ़ बर एक सौ सैंतालिस करोड़ छिहत्तर लाख रूपिया के देहे मंजूरी ।
- रईपुर दक्षिण विधानसभा क्षेत्र बर होवइया उपचुनई के चुनाव प्रचार आज संझा सिरा गे – वोट तेरह नवंबर के डारे जाही ।
- भारतीय सड़क कांग्रेस के तिरासीवां वार्षिक अधिवेशन के आज होइस समापन— अधिवेशन म कुल चौदह ठिन डाक्यूमेंट ल दे गीस मंजूरी ।

अग्निशमन सेवा—छत्तीसगढ़ राशि

केन्द्रीय गृह अउ सहकारिता मंत्री अमित शाह के अगुवई म एक ठिन उच्च स्तरीय समिति ह “राज्यों में अग्निशमन सेवाओं के विस्तार और आधुनिकीकरण” योजना म छत्तीसगढ़, ओडिशा अउ पश्चिम बंगाल बर करीबन सात सौ छब्बीस करोड़ रूपिया के तीन ठिन परियोजना मन ल मंजूरी देहे। समिति ह छत्तीसगढ़ बर एक सौ सैंतालिस करोड़ छिहत्तर लाख रूपिया मंजूर करे हे ।

जानबा के मुताबिक केंद्र सरकार ह “राज्यों में अग्निशमन सेवाओं के विस्तार और आधुनिकीकरण” योजना बर एनडीआरएफ के तहत पांच हजार करोड़ रूपिया आबंटित करे हे, जेमा पंद्रह ठिन राज्य मन बर दू हजार पांच सौ बयालिस करोड़ रूपिया ले जादा के प्रस्ताव मन ल पहिलीच ले मंजूरी दे जा चुके हे।

## भारतीय सड़क कांग्रेस-समापन

भारतीय सड़क कांग्रेस के तिरासीवां वार्षिक अधिवेशन आज सिरागे। राजधानी रईपुर म होय ए अधिवेशन म अट्टारा टिन तकनीकी सत्र के आयोजन करे गीस। जेमा देस अउ विदेस के बिसेसज्ञ अउ इंजीनियर मन अपन बात राखिन।

भारतीय सड़क कांग्रेस के वार्षिक अधिवेशन के आखिरी दिन आज काउंसिल मीटिंग राखे गीस। चार दिन तक चले ए अधिवेशन म कुल चौदह टिन डाक्यूमेंट ल मंजूर करे गीस, जेमा ले सात टिन सड़क ले जुड़े हे, त उन्हें, आने सात टिन पुल-पुलिया ले जुड़े हे। भारतीय सड़क कांग्रेस महासचिव संजय कुमार निर्मल ह बतइन कि अधिवेशन म लोगन मनके सुविधा ले जुड़े एक टिन डाक्यूमेंट घलो मंजूर करे गेहे।

चार दिन तक चले ए वार्षिक अधिवेशन म रद्दा मन ल कइसन ढंग ले बढ़िया बनाय जाय एखर उपर गोठबात होइस। ए गोठबात अउ सुझाव ल भारतीय सड़क कांग्रेस ह एक टिन रिपोर्ट तियार करके भारत सरकार ल भेजही।

भारतीय सड़क कांग्रेस के निवर्तमान अध्यक्ष अउ छत्तीसगढ़ सरकार के लोक निर्माण विभाग म इंजीनियर इन चीफ कमलेश कुमार पिपरी ह बतइन कि छत्तीसगढ़ म करीबन चालीस प्रतिशत सड़क दुर्घटना आवार पसु मन ले होथे। ए मुद्दा ल घलो अधिवेशन म उठाय गीस। भारतीय सड़क कांग्रेस कोति ले प्रदेश म आवारा पसु के सेति होवइया सड़क दुर्घटना ल रोके बर भारतीय सड़क कांग्रेस ह अवइया तीन महिना म दिसा-निरदेस जारी करही।

अधिवेशन के दउरान सेंट्रल रोड रिसर्च इंस्टीट्यूट के डायरेक्टर प्रोफेसर मनोरंजन परिदा ल भारतीय सड़क कांग्रेस के नवा अध्यक्ष चुने गीस। त उन्हें, राहुल गुप्ता ह नवा महासचिव होही।

भारतीय सड़क कांग्रेस के चौरासिवां वार्षिक अधिवेशन अवइया बछर गुवाहाटी असम म राखे गेहे।

## संजीव खन्ना-मुख्य न्यायाधीश

न्यायमूर्ति संजीव खन्ना ह आज भारत के इंक्यावनवां मुख्य न्यायाधीस के रूप म सपथ लीन। राष्ट्रपति द्रौपदी मुर्मू ह राष्ट्रपति भवन म ओमन ल मुख्य न्यायाधीस के रूप म सपथ देवाइन। न्यायमूर्ति संजीव खन्ना ह न्यायमूर्ति डी.वाई.चंद्रचूड़ के जघा लेहे, जउन मन काली रिटायर होइन।

ए सपथ ग्रहण समारोह म उप राष्ट्रपति जगदीप धनखड़, प्रधानमंत्री नरेंद्र मोदी के संगेसंग कतकोन केंद्रीय मंत्री अउ सर्वोच्च न्यायालय के न्यायाधीस के संगेसंग अउ आने कतकोन बड़का लोगन मन सामिल होइन।

## रायपुर दक्षिण—उपचुनाव

रईपुर दक्षिण विधानसभा क्षेत्र बर होवइया उपचुनई के चुनाव प्रचार आज संझा सिरा गे। जेखर बाद प्रत्यासी अउ उंखर समर्थक मन घरो—घर जाके लोगन मनले मिलके प्रचार सुरू कर देहे। प्रचार के आखिरी दिन आज मुख्यमंत्री विष्णुदेव साय ह भाजपा प्रत्यासी सुनील सोनी के पक्ष म रोड—सो करीन। ए रोड—सो म भाजपा के महिला मोर्चा अउ युवा मोर्चा के कार्यकर्ता मन घलो सामिल होइन। त ओति, कांग्रेस के बड़का नेता मन घलो कांग्रेस प्रत्यासी आकाश शर्मा के पक्ष म कतकोन जघा जनसभा लीन।

उप जिला निर्वाचन अधिकारी उमाशंकर बंदे ह आकाशवाणी समाचार ले गोठबात करत बतइन कि ए उपचुनई बर कुल दू सौ छैंसठ निर्वाचन केंद्र बनाय गेहे। जेखर बर मतदान दल ल काली बिहनिया सात बजे भेजे जाही। मतदान वाले जिनिंस मनके बांटे के काम रईपुर के सेजबहार स्थित इंजीनियरिंग महाविद्यालय ले करे जाही।

उहें, रईपुर दक्षिण विधानसभा उपचुनई बर तेरह नवंबर के होवइया मतदान बर वोटर मतदाता मन फोटो पहिचान पत्र के बारह ठिन वैकल्पिक फोटो वाले दस्तावेज देखाके वोट डार सकथे। मुख्य निर्वाचन पदाधिकारी रीना बाबा साहेब कंगाले ह बतइन कि फोटू पहिचान पत्र के संगेसंग आधारकार्ड, मनरेगा जॉब कार्ड, फोटू वाले पासबुक, स्मार्ट कार्ड, ड्राइविंग लाइसेंस, पेन कार्ड, भारतीय पासपोर्ट जइसन कार्ड देखाके वोटर मन अपन मत के परयोग कर सकथे।

ऐति, रईपुर दक्षिण विधानसभा बर होवइया उपचुनई म चुनाव लड़इया कतकोन राजनीतिक दल मनके प्रत्यासी मन ल मतदान ले एक दिन पहिली विज्ञापन मनके प्रमाणन, मीडिया प्रमाणन निगरानी समिति ले कराना होही।

रईपुर दक्षिण विधानसभा उपचुनई बर तेरह नवंबर के वोट डारे के दिन ए विधानसभा क्षेत्र के मतदाता अधिकारी—करमचारी मन बर छुट्टी के घोसना करे गेहे।

रईपुर कलेक्टर अउ जिला निर्वाचन अधिकारी डॉक्टर गौरव सिंह ह तेरह नवंबर के होवइया उपचुनई म मतदाता मन ले वोट डारे के अपील करे हे।

## सतीश चन्द्र वर्मा—याचिका

राज्य आपराधिक अन्वेषण ब्यूरो—ईओडब्ल्यू म दरज एफ.आई.आर. के बाद पूर्व महाधिवक्ता सतीश चंद्र वर्मा ह अग्रिम जमानत बर रईपुर के बिसेस कोर्ट म याचिका लगाय हे। ए जमानत याचिका उपर तेरह नवंबर के सुनवई होही।

जानबा के मुताबिक छत्तीसगढ़ के चर्चा म आय नान घोटाला मामला म दू जिन पूर्व आईएस अधिकारी अउ पूर्व महाधिवक्ता के खिलाफ मामला दरज करे गेहे।

### विंग कमांडर-निधन

रिटायर विंग कमांडर एमबी ओझा के काली रईपुर म निधन होगे। ओमन नवासी बछर के रिहीन। विंग कमांडर एमबी ओझा ह बछर उन्नीस सौ बैसठ, उन्नीस सौ पैसठ अउ उन्नीस सौ इकहत्तर के युध्द म सामिल होय रिहीन। श्री ओझा ह भारतीय शांति सेना के आने मिसन मन म घलो सामिल रिहीन। उन्नीस सौ इकहत्तर के युध्द म ओमन भारत के जीत के साक्षी बनिन। जब पाकिस्तानी सेना के नब्बे हजार सैनिक मन ह जनरल जगजीत सिंह अरोड़ा के आगू हथियार डालिन ओ बेरा विंग कमांडर एमबी ओझा ह घलो भाग ले रिहीन।

राज्यपाल रमेन डेका अउ मुख्यमंत्री विष्णुदेव साय ह रिटायर विंग कमांडर एमबी ओझा के निधन उपर ओमन ल श्रध्दांजलि दे हवय।

### विधिक सेवा प्राधिकरण-अध्यक्ष

राज्य सरकार ह छत्तीसगढ़ उच्च न्यायालय के वरिष्ठ न्यायाधीश संजय के. अग्रवाल ल छत्तीसगढ़ राज्य विधिक सेवा प्राधिकरण के कार्यपालक अध्यक्ष नियुक्त करे हे। न्यायाधीश संजय के. अग्रवाल ह छत्तीसगढ़ हाई कोर्ट म अपन न्यायिक कामकाज के दउरान कतकोन जरूरी अउ प्रभावसाली फैसला सुनाय हे।

## हाथी/बाघ-मौत

बलमरामपुर जिला के मुरका गांव के जंगल म एक टिन हाथी के सव मिले हे। ए घटना वाङ्गफनगर के मानिकपुर वन परिक्षेत्र के हरय। हाथी के मउत कइसे होइस एखर बारे म स्थिति अभी स्पष्ट नइ होय पाय हे। वन विभाग के टीम ह मउका म जाके जांच सुरू कर देहे।

ऐति, गरियाबंद जिला के सीता नदी क्षेत्र म पोटास बम फटे ले हाथी के सावक के घायल होय के समाचार मिले हे।

हमर संवाददाता ले मिले जानबा के मुताबिक उदंती-सीतानदी क्षेत्र म अइतीस ले जादा हाथी मन घूमत रिहीन, इही दउरान एक टिन हाथी के सावक सिकारी मन डहार ले लगाय गे पोटास बम के चपेट म आ गे। वन विभाग ह घायल सावक के इलाज करत हे। घटना के बाद वन विभाग ह थाना म एफआईआर दरज कराय हे अउ आरोपी के जानकारी देवइया मनखे ल दस हजार रूपिया ईनाम देके घोसना करे गीस।

ओति, कोरिया जिला म एक टिन बाघ के मउत होय के समाचार मिले हे। गांव के लोगन मन ह पाछू आठ नवंबर के खनखोपड़ नरवा के तीर बाघ के सव मिले के सूचना वन विभाग ल दीन। सुरूआती जांच म पाय गीस बाघ के सव ह दू-तीन दिन जुन्ना हरय। ए मामला के जांच करे जात हे।

**\*\*\*\*\***